

佛說十吉祥經

信六

八

開元附秦錄失譯師名

如是我聞一時佛在羅閱祇耆闍崛山中與大比丘衆千二百五十人菩薩五千人俱爾時世尊與無央數百千人前後圍遶而爲說經時大會中有一大士名離垢蓋承佛威神即從座起偏袒右肩右膝著地叉手合掌前白佛言今可現有諸佛世尊如來至眞等正覺若善男子善女人求佛道者聞其名號受持讀誦疾得不退轉於無上正眞道佛告離垢蓋大士善哉善哉族姓子乃能作是問多所利益有族姓子東方去此度一恒沙數諸佛世界有世界名號莊嚴其刹有佛名大光耀如來至眞等正覺今現在說法復有族姓子東方度二恒沙數諸佛世界有世界名諦

勝諸勝其刹有佛名慧燈明如來有世界名金剛其刹有佛名大雄如來有世界名淨尊住其刹有佛名無垢塵如來有世界名金光明其刹有佛名上像幢十蓋正如來有世界名大威神其刹有佛名威神自在王如來有世界名香熏其刹有佛名極受上願王如來有世界名寶嚴其刹有佛名內寶如來有世界名海燈明其刹有佛名大海如來有世界名十力燈明其刹有佛名十力現如來當知無垢蓋若善男子善女人求佛道者恒邊沙刹滿中七寶持用布施如來正覺若善男子善女人聞此佛名受持諷誦執在心懷於大衆中爲人廣說此之功德過前功德欲重解義而說偈言

如恒邊沙諸佛世界滿中七寶持用布施

若有得聞諸佛名號信樂不忘功德過前
若聞諸佛名諷誦莫忘失其人不疑
言我不成佛六通無窮盡至于無數劫
其身當金色相好以莊嚴若持佛名號
過於十億劫疾得成正覺
佛說經竟離垢蓋大士諸菩薩等天龍鬼神
及世間人咸皆歡喜頂受佛教

佛說十吉祥經